

runt omnia ossa mea. Et pedes.... Gló-
ria Patri.... Foderunt.... *Ÿ.* O vos om-
nes, qui transitis per viam. *R.* Atténdite, et
vidéte dolórem meum.

AD SEXTAM.

Añã. Alligávit Dóminus.

Capítulum. *Isaie* 50.

FACIEM meam non avérti ab increpántibus,
et conspuéntibus in me. Dóminus Deus au-
xiliátor meus, et ideo non sum confúsus.

R. br. Veré languóres nostros * Ipse tu-
lit. Veré.... *Ÿ.* Et dolóres nostros ipse por-
távit Ipse tulit.... Glória Patri.... Veré
languóres..... *Ÿ.* Disciplína pacis nostræ su-
per eum. *R.* Et livóre ejus sanáti sumus.

AD NONAM.

Añã. O vos omnes.

Capítulum. *Isaie* 53.

TRADIDIT Christus in morte ánimam suam
et cum scelerátis reputátus est; et ipse pec-
cáta multórum tulit, et pro transgressóribus
rogávit.

R. br. Ipse vulnerátus est * Propter ini-
quitátes nostras. I pse.... *Ÿ.* Attritus es

propter scélera nostra. Propter iniquitá-
tes.... Glória Patri.... Ipse vulnerá-
tus est.... *Ÿ.* Oblátus est quia ipse vóluit.
R. Et non apéruit os suum.

In secundis Vesp. omnia ut in primis.

AD MAGNIFICAT.

Añã. Ego sum vestra redemptio: manus
meæ, quæ vos fecerunt, clavis confixæ sunt:
propter vos flagéllis cæsus sum, spínis co-
ronátus sum, aquam pétii pendens, et acé-
tum porrexerunt; in escam meam fel dedé-
runt, et in latus lanceam: mórtuus et sepúl-
tus resurrexi: vobiscum sum, et vivo in
æténum.

FERIA SEXTA.

POST DOMINICAM IV. QUADRAGESIMÆ.

DE PRETIOSISSIMO SANGUINE D. N. J. C.

DUPLEX MAJUS.

*Omnia ut in ejus festo Dominica prima
Julii.*

DIE XXVI. APRILIS
IN FESTO APPARITIONIS SACRÆ IMAGINIS

BEATÆ MARIÆ VIRGINIS.

DE BONO CONSILIO
NUNCUPATÆ.

DUPLEX MAJUS.

Omnia ut in festis B. M. V. præter sequentia.

AD MAGNIFICAT ANTIPHONA.

SANCTA Maria, sucurre miseris, juva pusillâmines, réfove flébiles, ora pro pópulo, interveni pro clero, intercède pro devóto femíneo sexu, séntiant omnes tuum juvâmen, quicúmque célebrant tuæ sanctæ Imâginis apparitiónem.

ORATIO.

BONORUM ómnium largítor Deus, qui Genitricis dilécti Filii tui speciósam Imâginem

mira Apparitióne clarificáre voluísti: concède, quæsumus; ut ejúsdem beátæ Mariæ Virgínis intercessióne ad cœlestem pátriam feliciter perducámur. Per eúndem Dóminum.

AD MATUTINUM.

HYMNUS.

PLAUDE festivo, pia gens, honóre,
Dum Genestáni veneráris ædem,
Qua Dei magnæ Genitricis alma
Splendet imâgo.

Hæc ubi mira spécie repente
Obtulit sese pópulis videndam,
Multa mox secum bona ferre nostras
Visa per oras.

Ipsa tunc ægris áderat, moléstos
Córporis morbos animique pellens,
Longe et ærúmnas Látio imminéntes
Ipsa fugábat.

Virgo, quæ magnis decoráta signis,
Nunc quoque effúlges, miseris juvâmen
Affer, et fuis pátiens cliéntum
Annue votis.

Sit salus illi, decus, atque virtus,
Qui super cæli sólio coruscans,
Tótius mundi sériem gubérnat
Trinus et unus. Amen.

In primo Nocturno.

De libro Proverbiórum.

Lectio I.

Cap. 2.

SI intráverit sapiéntia cor tuum, et sciéntia ánimæ tuæ placuérit, consílium custódiét te, et prudéntia servábit te, ut eruáris a via mala, et ab hómine, qui pervérsa lóquitur; qui relínquunt iter rectum, et ámbulant per vias tenebrósas; qui lætántur cum male fécerint, et exúltant in rebus péssimis, quórum viæ pervérsæ sunt, et infámes gressus eórum. *R.* Sancta et immaculata.

Lectio II.

Cap. 3.

FILI mi, ne éffluent hæc ab óculis tuis. Custódi legem atque consílium; et erit vita ánimæ tuæ, et grátia fáucibus tuis. Tunc ambulábis fiduciáliter in via tua, et pes tuus non impínget. Si dormíeris, non timébis; quiésces, et suávis erit somnus tuus. Ne páveas repentinó terróre, et irruéntes tibi poténtias impiórum. Dóminus enim erit in lá-

tere tuo, et custódiét pedem tuum, ne capiáris. *R.* Congratulámini.

Lectio III.

EGO sapiéntia hábito in consílio et eruditís intérsus cogitatióibus. Timor Dómini odit malum, arrogántiam, et supérbiam, et viam pravam, et os bilíngue detéstor. Meum est consílium, et æquitas, mea est prudéntia, mea est fortitúdo. Per me reges regnant, et legum conditóres justa dicérunt. Per me príncipes ímperant, et potentes decernunt justítiam. Ego diligéntes me díligo: et qui mane vígilant ad me, invénient me. *R.* Beata es.

In secundo Nocturno.

De Sermóne S. Augustíni Epíscopi.

Lectio IV.

In Natali S. Joannis Baptistæ.

HÓMINEM concépit Elísabeth, hóminem Maria: sed Elísabeth solum hóminem, Maria Deum et hóminem. Mira res est, quómodo potúerit concípere creatúra Creatórem. Quid

est ergo intelligendum, fratres mei, nisi quia ipse sibi fecit carnem de sola matre, qui fecit primum hominem sine patre et matre? Primus ille noster casus fuit, quando foemina, per quam mortui sumus, in corde concepit venena serpentis. Persuasit enim serpens peccatum, et admissus est male suadens. Si primus noster casus fuit, cum femina concepit corde venena serpentis; non mirandum, quod salus nostra facta est, cum foemina concepit in utero carnem Omnipotentis. Uterque ceciderat sexus; uterque fuerat reparandus. Per mulierem in interitum missi eramus; per mulierem nobis redita est salus. *R.* Sicut cedrus.

De Sermone S. Fulgentii Episcopi.

Lectio V.

De laudibus Marice.

QUONIAM diabolus per serpente[m] Evæ locutus, per Evæ aures mundo intulit mortem, Deus per Angelum ad Mariam pertulit verbum, et cunctis sæculis vitam effudit. Angelus sermonem ejecit, et Christum Virgo concepit. Hoc splendore concepitur Dei Fí-

lius: hac munditia generatur. De cœlis Medicus transiens per Virginem, post transitum suum illæsam fecit Virginem permanere. Qui enim disrúpta cõrporum membra in aliis poterat integrare tangendo, quanto magis in sua Matre, quod invenit integrum, potuit non violare nacendo? Crevit enim ejus partu integritas cõrporis potius, quam decrevit: et virginitas ampliata est potius, quam fugata. *R.* Quæ est ista.

Lectio VI.

MARIA quam præclarissimis tribus bonis sublimetur, ausculta, salutatiõnis angelicæ benedictiõnis divinæ, et plenitudinis gratiæ. Sic enim eam legitur salutasse: Ave Maria gratia plena, benedicta inter mulieres. Et ut nihil non sublime esset in hac sanctissima Virgine, quam Angelus gratia plenam salutavit, non sine divino consilio factum est, ut ejus etiam imágines summo essent in honore, et prodigiis, miraculisque clarerent. Quas inter tribus abhinc sæculis ea præcipuo honore colitur, quæ, Paulo secundo sedente, mirabiliter apparuisse in pariete Ecclesiæ Patrum Ordinis Eremitarum sancti Augustini in oppido Genestani Præ-

nestinæ diocesis, ex pontificiis diplomatis, et supparibus monumentis comprobatur. Quibus permotus Pius Papa sextus prefatis ejusdem oppidi cenobitis officium proprium concessit septimo Kalendas Majas, ipso scilicet Apparitionis die recitandum; ac deinde illud die, quæ immediatè subsequitur, pro ejus recitatione in posterum assignata, ad universum predictum Ordinem sub ritu duplicis majoris extendit. R. Ornatam monilibus.

In tertio Nocturno.

Lectio Sancti Evangelii secundum Matthæum

Lectio VII.

Cap. 1.

LIBER generationis Jesu Christi filii David, fili Abraham. Abraham genuit Isaac. Isaac autem genuit Jacob. Et reliqua.

Homilia Sancti Thomæ Episcopi.

In Conc. 2. Nativit. B. M. V.

COGITANTI mihi, ac diu hæsitanti, quid causæ sit, quod cum Evangelistæ de Joanne Baptista, et aliis Apostolis tam longum fecere tractatum, de virgine Maria, quæ vita

et dignitate omnes antecedit, ita summam percurrant historiam: cur, inquam, non traditum est memoriæ, quomodo concepta, quomodo nata, quomodo nutrita, quibus moribus decorata, quibus virtutibus ornata, quid cum Filio in humanis egerit, quomodo cum illo conversata sit, quomodo post ejus ascensionem cum apostolis vixerit? Magna erant hæc, et memoratu digna, et quæ summa devotione a fidelibus legerentur, a populis amplecterentur. Quis enim dubitat, quin in ejus nativitate, et pueritia mira multa contigerint; et Puella hæc in teneris annis stupendum sæculis virtutum omnium monumentum extiterit? R. Felix namque es, sacra Virgo Maria, et omni laude dignissima: * Quia ex te ortus est Sol justitiæ, Christus Deus noster. V. Ora pro populo, interveni pro clero, intercede pro devoto femineo sexu: sentiant omnes tuam juvenam, quicumque celebrant tuæ sanctæ Imaginis apparitionem. Quia.

Lectio VIII.

HÆC mihi hæsitanti, cur de actibus Virginis, sicut de actibus Pauli, non est compo-

tus liber, nihil aliud occurrat (accusare enim Evangelistas negligentiae sicut impium, ita et temerarium iudico) quam ita placuisse Spiritui sancto; ejusque providentia Evangelistas siluisse, propterea quia Virginis gloria, sicut in Psalmis legitur, omnis intus erat et magis cogitari poterat, quam describi; sufficitque ad ejus plenam historiam, quia de illa natus est Jesus. Quid amplius quaeris? Quid ultra requiris in Virgine? Sufficit tibi, quod Mater Dei est. R. Beatam.

Lectio IX.

Non eam Spiritus sanctus litteris descripsit, sed tibi eam animo depingendam reliquit, ut intelligas, nihil illi gratiae, aut perfectionis, aut gloriae, quam animus in pura creatura concipere possit, defuisse; imo reipsa intellectum omnem superasse. Ubi ergo totum erat, pars scribenda non fuit; ne putares, quod scriptum non fuerat, eidem forsitan defuisse. Si ancillas suas et ministras domus suae potentissimus Dominus ita mirifice decoravit, ita donis et gratiis venustavit: qualem existimas, condidit Matrem suam, unicam Sponsam suam, quam

sibi ex omnibus elegit, et praee omnibus admaavit? Omnibus eam Altissimus praeposuit non solum virgineis, sed etiam angelicis Choris, quia Mater ejus est, et Matrem Dei decet omnis celsitudo. Quidquid igitur de Virgine scire, aut intelligere cupis, totum in hoc clauditur breviloquio: De qua natus est Jesus. Haec longa et plenissima historia ejus est. Te Deum.

DIE XVII AUGUSTI.

B. TIMOTHEI A MONTICULO C. L. O.

SIMPLEX.

ORATIO.

DEUS qui nos beati Timothei confessoris tui annua solemnitate laetificas: concede propitius; ut cujus natalitia colimus, etiam actiones imitemur. Per Dominum.

Lectio IX.

TIMOTHEUS in oppido Monticuli, prope urbem Aquilæ honesto genere natus, ut animum a mundi illécebris serváret incólumen Deoque únice inserviret, adhuc jávenis Ordini Sancti Francisci inter Fratres Minores, quos vocant de Observantia, nomen dedit. Regularis disciplinæ severíssimus cultor, ac cœlestium rerum contemplátor assiduus, humilitáte, abstinéntia, paciéntia aliisque religiósí hómínis virtútibus ita exceluit, ut ómnibus admiratióni esset, et Sacrum faciens supernas quoque visiões promeruisse feratur. Cum autem ad sexagésimum vitæ annum illústria dedísse sanctitátis exémpła, Ocræ inter fines Aquilánæ Diocéseos spíritum Deo réddidit anno reparatæ salutis millésimo quingentésimo quarto, ibique in Ecclesiá sui Ordinis honorifice cónditus est. Cultum statim a morte illi a circumstantibus pópulis exhibitum Pius Nonus Póntifex Maximus ex Sacrórum Rituum Congregationis consúlto ratum habuit et confirmavit, ejusque festum in memorata Diocési cum Officio et Missa celebrari permísit.

DIE XXX. OCTOBRIS

IN FESTO

B. LIBERATI A LAURO.**CONF. I. ORD.**

DUPLEX MINUS.

*Ommia de Comm. Conf. non Pont. præter seq.**In Hymn. Meruit supremos.*

ORATIO.

DÓMINE Jesu Christi, qui Beatum Liberátum confessorem tuum a cæculi pompa ad suam tolléndam crucem ac te sequendum vocasti: concede propitius; ut ejus exémplo, caduca despícere ac te pura mente diligere valeamus. Qui vivis.

In I. Noct. Lect. de Scriptit. occur.

In secundo Nocturno.

Lectio IV.

LIBERATUS a Lauro, in Piceno, ex nobilissima Cómítum Brumfortiórum gente ortum duxit ineúnte sæculo decimotertio. Brevi tamen, ut vocantem spíritum sequeretur, mundi vanitatibus, fluxisque divitiis nuntium dare, seque Deo totum mancipare statuit. Qua de re inter Fratres Seraphici Minorum Ordinis, insignibus pietate viris, tunc máxime floréntis, se se cooptari postulávit; voti- que compos factus in Cœnobium secessit, quod prope Castrum Brumfortium solitario loco, Suffiano nuncupato, nemóribus inter- cluso, divinorumque contemplationi oppor- tuníssimo Sancti Francisci Assisinatis As- seclæ sibi paráverant. R. Honestum fecit.

Lectio V.

SACERDOTIO insignitus, vitam ibi duxit ad mortem usque virtútibus adeo claram, ut humilitatis, integritatis, asperitatis, in corpus

suum sodalibus exemplar extiterit, ac effun- dendis Deo précibus dies noctesque integras constantissime insumpserit. Silentio quoque, solitudini, divinorumque meditationi ita va- cavit, ut raro ádmodum vel cum suis loque- retur; et si aliquando interrogántibus satis- facere oporteret, ita respondebat ut Ange- lus potius videretur quam homo. R. Amavit.

Lectio VI.

QUO perfectissimum virtutum genere vitam traducens, divinoque ardore jugiter incen- sus, in ecstasim sæpius rapi a Deo promé- ruit, ceu traditum est, et cum póstmodum sensus reciperet, tantam præseferbat men- tis lætiam ex prægustatióne superni gaudii, tantoque vultus ejus cœlesti fulgóre perfusus apparebat, ut ómnibus admiratióni esset, ac Sanctus communi voce prædicaretur. Tan- dem consumátus in brevi explévit témpora multa. Austeritate enim vitæ et charitatis igne consumptus, in morbum incidit, et ad extremum subinde adductus, fratres suos álloquens de cœlesti glória, atque animo exultans, feliciter abdormivit in osculo Dó- mini, anno circiter millésimo ducentesimo

sexagesimo. Corpus ejus ad locum Brumfortii, a suo nomine, ex tunc vocatum, translatum est una cum reliquiis Beatorum Humilis ac Pacifici ejusdem Ordinis, magnaque ibi veneratione Beatus Liberatus colitur, miraculis multis uti fertur clarus. *R.* Iste homo perfecit.

In III. Nocturno Homil. in Evang. Nolite timere, pusillus grex.

PRIMI LOCI

PRO MARTYROLOGIO ORDINIS MINORUM,

EX NOVISS. S. R. C. CONCESSIONE.

Feria 3. post Dom. Septuag.

Festum orationis Domini Nostri Jesu Christi in Monte Oliveti.

Feria 3. post Dom. Sexages.

Festum commemorationis Passionis Domini Nostri Jesu Christi.

Feria 6. post Cineres.

Festum Sacrae Spinae Coronae Domini Nostri Jesu Christi.

Feria 6. post Dom. 1. Quadrag.

Festum Lanceae et Clavorum Domini Nostri Jesu Christi.

Feria 6. post Dom. 2. Quadrag.
Festum Sacratissimæ Síndonis Dómini
Nostri Jesu Christi.

Feria 6. post Dom. 3. Quadrag.

Festum Sacrorum quinque Vulnerum Dó-
mini Nostri Jesu Christi.

Feria 6. post Dom. 4. Quadrag.

Festum Pretiossímisi Sánguinis Dómini
Nostri Jesu Christi.

Die 26 Aprilis.

In oppido Genestani Prænestinæ Diece-
sis Festum Sacræ Imaginis Beatæ Mariæ
Virginis de Bono Consilio nuncupatæ, quæ,
Paulo secundo Summo Pontifice sedente,
mirabiliter in Ecclesia Ordinis Eremitarum
Sancti Augustini apparuit, ac miraculorum
magnitudine et præstantia celebris, frequen-
ti populorum concursu, maximaque religio-
ne colitur.

IN LITANIIS

SANCTOR. ORDIN. MINOR.

ADDENDA SUNT SEQ. NOMIN.

—
Post S. Nicolæe.

S. Petri Baptista, cæterique Socii Marty-
res Japonenses.—Orate pro nobis.

S. Nicolæe, cæterique Martyres Gorco-
mienses.—Orate pro nobis.

Post S. Joann. Josephi.

S. Leonarde.—Ora pro nobis.

Post S. Hyacinthæ.

S. Maria Francisca.—Ora pro nobis.